

**ORATIO
INAUGURATORIA
STUDIORUM
BONONIENSIS IN
ARCHIGYMNASIO...**

Flaminio Scarselli



ORATIO
INAUGURATORIA
STUDIORUM
BONONIENSI IN ARCHIGYMNASIO
HABITA
A
FLAMINIO SCARSELLIO

HUMANIORUM LITERARUM LECTORE EMERITO,
ET EXCELSI BONONIE SENATUS

A SECRETIS



Pridie Nonas Novembres
MDCCLXII.

(3)



I quo primum die post longum Patrizæ desiderium expectatissimo, & omnium, quotquot memoria repeto, jucundissimo a diuturno silentio ad pristinam redeo rationem, consuetudinemque dicendi, hoc ipso die latam, & expeditam ad optimarum Artium studia patere viam, nec impedimenta naturæ, nec adversos fortunæ casus, nec cætera vitæ incommoda fausto, & glorioso cursui obesse, cunctationemque propterea omnem, atque formidinem abigendam esse contendero, non dubito me vel insipientiæ, vel impudentiæ nomine reprehensum iri, & in maximorum virorum sive contemptum, sive indignationem protinus incursum. Jam enim audio nonnullos haud obscure contradicentes, & dissimulantiam hanc meam graviter increpantes. Hem

A 2

egre-

egregium , inquiunt , hem præclarum videlicet Oratorem , seu effrontem potius , & ineptum Circulatorem , qui ab ipso Orationis aditu assentari nobis , atque blandiri , nosque in re gravissima fallere non vereatur . Sed hominem agnoscimus , magnis , ut veterem Urbis dominæ habitatorem , elatum spiritibus , splendidisque educatum , atque eruditum exemplis , neque tam de sententiarum veritate , quam de argumenti jucunditate , & pompa sollicitum . Huic nempe si credimus , nihil jam erit , quod non appetere , quod non moliri , quod non audere ingenia debeant , moribusque illorum , & studiis sensim adhærebimus , qui sapientes cum non sint , & sapientes tamen haberi velint , summam rerum omnium ignorationem , turpemque desidiam mira sermonis arrogantia , & incredibili agendi temeritate obtendunt , ac protegunt , & quam aut ingenii præstantia , aut doctrinæ virtute tueri nequeant labantem ac dubiam nominis existimationem & famam , nobilitate generis , offitii auctoritate , loci amplitudine , vestium nitore , tarditate gressuum , gestus compositione , oris & vultus gravitate sustentant , & inanem vulgi admirationem , popularique gloriam aucupantur . Ego vero criminationem istam ita moleste fero , quin & ipsam hujusce criminis suspicionem usque adeo abhorreo , ut malim indoctum me , at modestum , quam doctum , & impudentem existimari ; & quam olim ex hoc loco differens palam professus sum , certissimis-

misque rationibus comprobavi, hanc ego sententiam teneo, & prædicabo, dum vivam, non fallacem, ac vacuum doctrinæ opinionem, sed veram, solidamque doctrinam probis, & ingenuis Adolescentibus expetendam. Verumtamen cum inter multas, ac varias, quæ in excolendis Artibus offendi solent, difficultates & moras importunus quidam angor, ac metus, animique demissio, & quasi desperatio studiorum rationem plerumque tardet, nonnumquam etiam impediatur, operæ pretium facturum me duxi, si posteaquam anno millesimo septingentesimo trigesimo octavo effrenatam quorundam audaciam, atque immodestam securitatem infringere, & emendare conatus sum, nimiam nunc aliorum timiditatem minuere, fractamque spem, & virtutem renovare, & erigere institutam. Quo sane consilio prudentis, & strenui Imperatoris imitabor exemplum, cujus hæ sunt in re bellica partes præcipuæ, non modo ut fortes, ac generosos milites in officio contineat, omnesque temerarios ausus, & inconsideratos impetus moderetur, & comprimat, sed ut incertos etiam, ac pavidos ad subeunda pericula, ad perferendos labores, ad expugnandas arces, ad profligandos exercitus excitet, impellat, confirmet. At vires aliis, & animos addere qui viribus ipse, animoque destituitur plane non possum, nisi me numine afflari tuo, summa & increata Veritas, excelsa & infinita Sapientia, tuamque adesse

mihi lucem , ac fortitudinem sentiam . Te ergo purissime Spiritus , te cælestium munerum fons uberrime , unde ingenii opes , atque doctrinæ , & omnium præsidia , atque ornamenta virtutum ad habetes quoque , & infirmos homines non sine largitionis fructu , & largitoris gloria promanant ; Vosque , urbis & loci Custodes optimi , Præsidesque sanctissimi , pro mea erga vos fide , devotione , pietate , pro vestra in me benignitate , atque clementia enixe oro , atque obsecro , votis ut meis , studiisque bene auspicantes institutum Orationis cursum ad publicam dirigatis utilitatem , & ad eum exitum , quem causæ magnitudo , & literarum dignitas postulant , feliciter perducatis .

In adeundis optimarum Disciplinarum recessibus , aperiendisque mysteriis ingenuum quemdam pudorem , & plenum verecundiæ metum non modo non improbandum existimo , sed imperitis præsertim , & inexpertis Adolescentibus magnopere commendandum . Quid enim censeamus de cæteris sive doctoribus , sive doctrinis , posteaquam M. T. Cicero , singulare illud , & admirabile lumen ingenii , L. Crassum Oratorem maximum de claris sui temporis Oratoribus , & de se ipso ita loquentem inducit : *Equidem Et in vobis animadvertere soleo , Et in me ipso sæpissime experior , ut exalbescam in principiis dicendi , Et tota mente , atque omnibus artibus contremiscam . Adolescentulus*

(7)

tulus vero sic in initio accusationis exanimatus sum, ut hoc summum beneficium Q. Maximo debuerim, quod continuo consilium dimiserit, simul ac me fractum, ac debilitatum metu viderit. Sed habet ista ratio verecundiæ, ac timoris, aut certe habere debet in addiscendis, & explicandis Artibus quemdam modum, quem nisi mature adhibueris, cum præsumpta desperatione evadendi quo velis nec summa spectes, nec ad media contendas, necesse est te in ipso studiorum limine hære, & circa ima subsistere. Atqui ea, quam ingredimur, via plurimis septa est undique, & impedita difficultatibus, atque periculis. Fateor equidem, sed ante videndum est quot, & quanta sint hujusmodi impedimenta, quantique facienda. Sunt igitur qui brevitatem humanæ vitæ, sunt qui naturæ infirmitatem, sunt etiam qui perpetuam fortunæ perversitatem accusent. Dolent alii tarditatem ingenii & hebetudinem, alii judicia hominum plerumque fallacia, interdum improba reformidant. Magnam denique partem Artium difficultas moratur; prosternit, & obruit amplitudo. Jam quid valeant singula attendite; apparebunt enim, ut sunt, cogitando parva, & fient experiundo minora.

Vetus nimirum querela est, crebrisque usurpata, & trita sermonibus vitam hominis esse brevissimam, cum fugientis umbræ tenuitate, atque inconstantia merito comparandam. Quin & exigui

A 4

tem-

temporis unicuique ad vivendum dati partem sibi non exiguam vindicant debita religionis, & pietatis officia, reipublicæ munera, negotia domestica, majorum obsequia, propinquorum, & amicorum consuetudines; tertia vero, aut certe quarta cujusque diei, atque adeo totius vitæ pars pro varia naturæ necessitate somno teritur, & absumitur, ut non tam quiescere, & recreari, & ægritudines animi, & sollicitudines ponere, quam deficere in dies, ac prope emori videamur. Danda est præterea diuturnis meditationibus, atque laboribus remissio aliqua, modica illa quidem, ut recte admonet Quintilianus, *ne aut odium studiorum faciat negata, aut otii consuetudinem nimia*. Quid ergo in omni vita reliquum est, quod literarum cultui tribuamus, si universum tempus ætatis & angustis contineri finibus experimur, & id ipsum necesse est in multiplices, alienasque curas, & usus quotidie exigi, distrahi, dissipari? Satis enimvero pro studio, satis pro industria, satis pro diligentia Sapientum; pro optimarum Artium numero, varietate, difficultate, amplitudine profecto parum. Hinc, quemadmodum a Tullio narratum est, *Theophrastus moriens jure naturam accusasse dicitur, quod Cervis, Et Cornicibus vitam diuturnam, quorum id nihil interesset, hominibus, quorum maxime interfuisset, tam exiguam vitam dedisset, quorum si ætas potuisset esse longinquor, futurum fuisset, ut omnibus perfectis*

ſectis artibus omni doctrina hominum vita eruditur. Num propterea & Theophrastus ipſe, qui querebatur ſe tum, cum illa videre cœpiſſet, ex-tingui, & cæteri Philoſophi, qui multa ſe ignorare, & multa ſibi etiam atque etiam eſſe diſcenda confitebantur, vitæ brevitæ deterriti ſpe, & animis conciderunt, ſtudiis, & laboribus pepercunt? Immo vero memoriæ proditum legimus, cum multi aut juvenili, aut media ætate deceſſerint, pauci ad extremam ſenectutem pervenerint, omnes tamen Patriæ & Reipublicæ commo- do, literarum ornamēto, nominis celebritati diu multumque vi- xiſſe. Inventores Artium nobiliſſimos, Propagato- res eximios, Inſtauratores ruſum, Magiſtros, Mo- deratores quis recenſeat ſingulos? Quis præclata co- gitata, quis perpetua ſtudia, quis innumera experi- menta, quis immenſa volumina complectatur? Ni- hil ergo in eo dolendum eſt, quod acci- dat uni- verſis, neque tam de celerī ætatum curſu, quam de recto uſu temporis laborandum, ejusque ſpa- tiola omnia, & quaſi fruſtula diligentiffime colli- genda, ne qua pars irrita, ne qua deſerta, ne qua inanis, & vacua relinquatur. Nam quemadmo- dum apta rerum diſpoſitio, & commoda diſtribu- tio locorum, quibus illæ reconduntur & aſſervan- tur, opportunitatem, & quaſi amplitudinem au- get, ita horarum, & dierum prudens, & accurata parti- tio, tardiora quodammodo tempora ad elaben- dum facit, atque longiora.

A ;

Atqui

Atqui malorum turbam quamdam sentio ingruentem, & humanæ vitæ non brevitatem modo literatis viris incommodam, sed infinitas prope modum infirmitates, molestias, perturbationes ex adverso stantes, & literis inimicas intueor. Sic animo ad capeffenda studia optime comparato, ad excolenda satis alacri & firmo resistunt interdum morbi, resistunt dolores, resistit virium infirmitas, resistit stupiditas corporis, & inertia; aut contra cum vigili corpore, & valido, & patiente laboris pugnant animi curæ, pugnant sollicitudines, pugnant angores, pugnant deterrimæ malorum omnium voluptates, quarum quo major est aut amor, aut copia, eo magis mentem e sua sede deturbant, statuque dimovent. Quid si ad cæteras animi, & corporis ægritudines accedant temporum varietates, fortunæque vicissitudines, cujus in rebus humanis tantus est dominatus, tam multa, & tam inopinata pericula, tam iniqua plerumque, tam acerba, tam effera ludibria, atque tormenta? Quid si paupertatem adjicimus, si patriæ, & generis obscuritatem, si hominum inimicitias, fraudes, simulates, injurias? Possitne quispiam, quem tanta malorum vis circumstet, ac impetat, tam erecto, & confirmato animo esse, ut doctrinæ studium alacriter ineat, initum quiete, & impavide persequatur? Hunc si reperias, hunc ego Socrati, hunc magno præferam Archimedi, quorum alter veneno sumpto, & imminente jam morte

morte de animorum immortalitate placide, & copiose differuit, alter defixis in terram oculis, animoque in veri investigationem intento lineas non destitit ducere, circulosque describere, dum Syracusas interea igne hostis, ac ferro late vastaret, stansque miles, & districto immotum Geometram compellans gladio jam jam invaderet, & ipsius capiti immineret. Sed neque, ut arbitror, invenies quemquam tam ærumnosum, & miserum, in quem tot casus, tantasque calamitates vel natura invexerit, vel fortuna, & contra paucissimos, quos utraque rerum humanarum moderatrix, ac domina usque adeo dilexerit, ut omni solutos infirmitate, omni vacuos cura, & perturbatione dimiserit. Itaque cum ea sit conditio hominum, ut nemo non aliquid a natura ferat incommodum, non aliquid a fortuna vulnus accipiat, tum vero maxime præsidium in liberalibus disciplinis, & remedium malorum quærendum est, quemadmodum Philosophi omnes hæud incassum facere consueverunt. Quid ergo jacemus, aut cur timori succumbimus, quando Artes nobis, & Literæ dubiis in rebus consilium, in adversis perfugium præbent, rei familiaris angustias sublevant, patriam nobilitant, genus exornant, gloriam, honores, opes, imperia comparant? Nulla est in sapientem fortunæ vis, si modo absit a culpa. Nam exercitatio ingenii, mentis agitatio, studium veritatis, atque doctrinæ mirifice valent ad motus animi

componendos, ad tolerandos dolores, ad leniendas ægritudines, ad excitandas, confirmandasque virtutes, de quibus pulchre, ut solet, & vere Cicero prædicat : *eas nec eripi, nec surripi unquam posse, neque naufragio, neque incendio amitti, nec tempestatum, nec temporum permutatione mutari*, & in eamdem sententiam scribens egregium Dionysii junioris responsum aptissime refert, *qui regno dejectus cum rogaretur a quodam ecquid ex Platonis consuetudine esset affectus, an parum, inquit, vobis videor consecutus, quod presentem fortunam fortiter fero?* Adnitendum est igitur, neque tam naturæ incommoda, & rerum humanarum pericula metuenda, quam constantia animi, & fortitudo studio optimarum Artium, usuque comparanda, quæ profecto si aderit, numquam in consilium cogitationum nostrarum vel desperationem adhibebimus, vel timorem.

At pauci sunt, qui expedito, & celeri ad percipiendas, facili, ac nitido ad explicandas Artes ingenio polleant; multi contra, quos inter cæteras naturæ infirmitates ab ipso sapientiæ limine prohibet ingenii tarditas, atque hebetudo. Immo vero *falsa est*, si Quintilianum audimus, *falsa est querela paucissimis hominibus vim percipiendæ quæ tradantur esse concessam, plerosque vero laborem, ac tempora tarditate ingenii perdere. Nam contra plures reperias Et faciles in excogitando, Et*
ad

(13)

ad discendum promptos; quippe id est homini naturale; ac sicut aves ad volatum, equi ad cursum, ad sævitiam feræ gignuntur, ita nobis propria est mentis agitatio, atque solertia, unde origo animi cælestis creditur. Hebetes vero, Et indociles non magis secundum naturam hominis eduntur, quam prodigiosa corpora, Et monstris insignia. Sed hi pauci admodum; fuerit argumentum, quod in pueris elucet spes plurimorum, quæ cum emoritur ætate, manifestum est non naturam defecisse, sed curam. Ita acerrimus ille ingeniorum æstimator & iudex. Sunt tamen, ut idem fatetur, ingenia quædam imbecilla prorsus, ac nulla, quibus de liberalibus Disciplinis præcepta tradere perinde fuerit, ac de agrorum cultu sterilibus terris. Hujus notæ Adolescentes meo quidem iudicio statim dimittendi, & si quo forte natura ducantur, mature & provide transferendi. In humilioribus quoque, & mechanicis Artibus sua inest dignitas, & vera laus; quippe quæ aut omnino sunt societati, & vitæ hominum necessariæ, aut magnas afferunt ad usus Reipublicæ commoditates. Cæterum rationis & consilii plena humana mens admirabilia plerumque exerit ingenii lumina & ornamenta, neque mortalium quisquam nascitur, cujus animo non ingerat Deus veritatis, & sapientiæ uberrima semina, in quibus elementa, & opes scientiarum omnium non secus, atque in exiguo plantæ semine totius arboris fuculi,

culi, frondes, flosculi, fructus, partes denique omnes vel tenuissimæ continentur. Ac quemadmodum hæc beneficio blandi, & nutritii humoris teretes fibrillas, exilesque utriculos subeuntis sensim explicantur, augentur, nostrisque oculis subjiciuntur, ita quæ in nobis latitant rerum æternarum imagines diuturna meditatione quasi evolvuntur, & cura & diligentia adhibita paulatim prodeunt, & conspiciendas se præbent. Quod si vel ipsa corporis impedimenta studio & labore vincuntur, ejusque rei, ut mittam cætera, notissimum extat in Atticæ Eloquentiæ Principe exemplum, de quo magnifice scriptum est : *Demosthenem alterum natura enixa est, alterum industria* : an dubitemus cogitationem, vigilantiam, assiduitatem, solertiam, qui unus est pastus suavissimus animorum, ad agitandam & erigendam eorundem virtutem nihil valere, & ingenia diligentia usu, & offitio etiam ex tarditate non incitari? Quam porro tarditatem si cum nimia ingeniorum velocitate conferamus, utra doctrinæ studiis plus noceat, non facile judicaverim. Irrequietum enim, & præcox ingeniorum genus falsam plerumque induit scientiæ persuasionem, suisque præmature fidens viribus cum se nec labore subigi, nec arte excoli, nec diligentia temperari, & expoliri patiatur, nihil edit præclarum, nihil fructuosum, nihil ea dignum, quam sustinet, expectatione. Date precor, Auditores, hanc veniam, ut hoc etiam loco ele-

elegantissima ipsius Quintilianian de ingeniis hujusmodi verba commemorem. *Non subest*, inquit ille, *vera vis, nec penitus immixtis radicibus agitur, ut quæ summo solo sparsa sunt semina celerius se effundunt, & imitatæ spicas herbulæ inanibus aristis ante messem flavescent.* Contra qui ingenio paullo tardiores sunt levitate carent, & arrogantia, nescire se quod nesciant fatentur ingenuæ, rerum notiones accuratius exquirunt, plenius assequuntur, fidelius continent, secum ipsi profundius reputant, cum aliis diligentius communicant, atque adeo majorum gratiam, æqualium benevolentiam, minorum admirationem merentur.

Sit ita fane. Eritne propterea quispiam, qui judicia hominum tam incerta, tam varia, tam periculosa, tam difficilia, iniqua etiam interdum, & inimica non magnopere reformidet? Ego vero, Adolescentes optimi, sic existimo, quandoquidem fieri nullo modo potest, idem ut omnes intelligant, idemque velint, nihil esse a vobis in tanta accusatorum, & judicum diversitate, inter tot sententiarum, & obtestationum vicissitudines, atque procellas extimescendum. Nam probi quidem, & sapientes viri prudentiam in judicando adhibent, & æquitatem, modestam excitant indolem, generosos alunt conatus, diligentiam adjuvant, labores & studia commendant, si quæ præclare vel dicta, vel facta sunt, præmiis, & honori-

noribus prosequuntur, si quid contra peccatum est, in id blande, & humaniter, non acerbe, non aspere animadvertunt, rem arguunt, voluntatem excusant, & quæ deinceps eligenda, aut cavenda sint, quæ mutanda, aut renovanda, amice monent, & liberaliter pandunt. Judicia hujusmodi non injusta, non incommoda, non molesta, sed æqua, sed lenia, maximeque ad expurgandam, perficiendamque doctrinam accommodata quis denique metuat? quis abhorreat? quis refugiat? non optet potius? non diligat? non vereatur? Improborum autem, & insipientum opinionibus commoveri, eamque ob causam ab excolendis Artibus, a rebus gerendis abduci, solitaria, & veluti umbratili vita pallefcere aut inertissimæ segnitix fuerit, aut fastidii delicatissimi. *Philosophia paucis est, ut affirmat Cicero, contenta judicibus, multitudinem consulto ipsa fugiens, eique ipsi suspecta, Et invisa.* Idem de reliquis Facultatibus intelligendum, quæ popularia judicia stultorum, improborumque consensu excitata plane despiciunt, atque infra se posita merito arbitrantur. *Ad posteros virtus durabit, ait Quintilianus, non perveniet invidia.* Et rursus Cicero: *quid de te alii loquantur ipsi videant, sed loquentur tamen. Sermo autem omnis ille. Et angustiis cingitur iis regionum, quas vides, nec unquam de ullo perennis fuit, Et obruitur hominum interitu, Et oblivione posteritatis extinguatur.* Minime vero omnium, meo quidem consilio, timen-

timendi sunt, qui arbitrato quodam suo, atque consuetudine censores agunt, & iudices acres, indociles, rigidos, importunos, nihilque satis dignum putantes quod imitentur, nihil inveniētes quod probent, sine ullo vel personarum, vel temporum, vel locorum discrimine permiscēt omnia, atque perturbant, quidquid protuleris negligunt, quidquid egeris dedignantur, sibi que ipsi plerumque graves, invisi cæteris, & ingrati libertate animi, ingenii excellentia, doctrinæ auctoritate, non ad erudiendos, & adjuvandos, sed ad reprehendendos, & conterendos homines abutuntur; ut nostra præsertim ætate cum eruditissimo Jurisconsulto Jano Vincentio Gravina dolendum sit *artem criticam, quæ discrimen erat veritatis, & temporum, atque falsæ errorum, nunc seditioſarum literarum fomitem, ac ingeniorum turbinem evasisse.*

Sexta restat caussa, quæ maxime angere, & debilitare animos solet, Artium difficultas, & magnitudo, in quam plerique hominum intuentes aut propter inanem sollicitudinem, ineptamque formidinem ab ineunda studiorum ratione prorsus avertuntur, aut ab inita propter tædium, & impatientiam laboris turpiter revocantur. Haud equidem dissimulabo arduo, & excelsō loco positam esse, quam quærimus, sapientiam; neque inficiabor suprema virtutum, & honorum fastigia non sine adscensu parumper gravi, & incommodo super-

perari. Ergo quos pigeat cum doctis, & impigris ad summa contendere, eos ima in parte subfidere cum ignavis, & insipientibus non pudebit? Illud quoque verissimum est ex abditis plerumque fontibus hauriri Artes, difficiles habere aditus, ac plane immensos recessus, dubiis rationibus, incertisque experimentis involvi, multis, ac diversis quæstionibus implicari, animadversionibus prope modum infinitis, atque exceptionibus impediri. Ergo quos rerum novitas, causarum obscuritas, elementorum asperitas, disputationum, legumque multitudo, ac varietas conturbet, ac frangat, eos doctrinæ dignitas non excitabit, non movebit utilitas, pulchritudo mira, & suavitas non recreabit? O inertem, o tristem, o miseram animorum infirmitatem! O ingeniorum dedecus, & turpitudinem non ferendam! Quasi vero iter ingredi periculosum, & novum, tælebrofos inter, ac dubios viarum anfractus diu multumque jactari, inaccessa loca, & regiones inospitas peragrarè, metam denique remotissimam, & insperatam attingere nostris ipsi consiliis, & viribus, non aliena institutione, & opera debeamus; & memoriam præteritorum temporum repetentes præclara literarum monumenta, & egregia literarum exempla, quæ magnam difficultatis partem detrahant, oneris, & molestiæ non parvam, frustra desideremus. Maximæ profecto, & immortales Majoribus nostris habendæ sunt gratiæ, quod summa cura, & incredibili dili-

(19)

diligentia omnia, quæ dispersa, & dissipata quondam fuerunt, concluderint Artibus, certisque observationibus, ac præceptis comprehenderint, longis peregrinationibus, ac diuturnis vigiliis infinitam linguarum, & doctrinarum varietatem, populorum ingenia, mores, instituta, consuetudines, regnorum vicissitudines, & imperiorum descripserint, & integram nobis patrii, ac domestici otii libertatem, & quietem reliquerint, perpetuis studiis, & experimentis multiplices subtilissimarum quæstionum nodos expediverint, naturæ principia, & leges evolverint, splendidissimis cogitatis, atque inventis faciem sapientiæ prætulerint, & lucem veritatis ostenderint, testimoniis demum amplissimis, scriptisque elegantissimis materiam pene omnem in qualibet Arte occupaverint, & exhaustaverint, ipsamque rerum asperitatem mira sententiarum, & vocum suavitate resperferint, lenierint, temperarint. Quamquam quid ego ad minuendas Scientiarum, & Artium difficultates aut ab antiquis temporibus, aut ab externis regionibus subsidia repetam, atque adjumenta, quando presentia nobis & plane domestica, ac nostra tam multa, tam magna suppetunt, ut neque plura, neque majora (si fas est sine arrogantia dicere) vel excogitari possint, vel exoptari. Scholas, & Collegia requirimus? Scholæ pueris, Collegia patent adolescentibus, ubi quæ ad cultum, victumque corporum sunt necessaria, honeste, & commode parantur.

rantur omnia, animi ad egregia literarum studia, ad optima religionis, & pietatis officia liberaliter educantur, copiosi, & nitidi disciplinarum fontes recluduntur, doctrinæ insignia, & ornamenta honorificentissima tribuuntur. Vetustissimo, & nobili gymnasio excipi, lectissimis uti præceptoribus lubet? Quæ demum est ætas tam obscura, tam difflita, quam non Bononiensis Academiæ celebritas, & fama pervaserit? Quæ gens, quæ regio tam agrestis, & barbara, quam non Bononiensium Doctorum illustria nomina admiratione, & luce compleverint? Quorum ego Doctorum eruditionem, atque sapientiam ut semper magni fecerim, humanitatem certe, diligentiam, liberalitatem tum in excolendis, & exornandis ingeniis, tum vero, quod caput est, in formandis perpoliendisque moribus numquam satis prædicabo, summisque efferre laudibus, & cumulare non desinam. Bibliothecas adire juvat librorum copia, raritate, elegantia locupletissimas? machinas, & instrumenta omnis generis elaboratissima, pulchram, pretiosam, & a rebus omnibus instructissimam, quæ ad absolutam universæ Philosophiæ cognitionem, usumque pertinent, supellectilem recognoscere? Est in oculis omnium domicilium Scientiarum & Artium tota jam Europa celeberrimum ab immortali Marsilio conditum, Clementis XI auctoritate, & providentia confirmatum, Senatus consilio, vigilantia, sollicitudine conservatum, benignitate Clementis XII


am-

amplificatum, Academicorum scriptis, experimentis, observationibus commendatum, qua externorum, qua civium studiis, ac donis nobilitatum, paterna denique charitate, incredibili cura, admirabili, & plane inaudita Benedicti Quartidecimi munificentia non exornatum, & auctum, sed renovatum, atque perfectum, & in tanto dignitatis, & gloriæ lumine constitutum, ut populos ab ultimis terrarum oris advocare, cives e sinu Patriæ, liberos a parentum amplexu præ sui desiderio, & amore possit avellere. Quæ sane Pontificis Maximi beneficia, unde inusitatam capiunt, & singularem philosophica studia commoditatem, recensere nunc singula, & dicere prætermittam, tum quia Principis (quid dico Principis?) immo vero Parentis optimi dulcissima recordatio suspiria identidem, & lacrymas exprimens cursum Orationis abrumperet, tum quia ædes nobilissimas ineuntibus nitida ubique vestigia, & prope infinita se offerunt liberalitatis, & sapientiæ suæ, tum quia Bononiensis Scientiarum, & Artium Instituti, & Academiæ Commentarii æquissimis pariter, & magnificentissimis Benedicti laudibus referti sunt: quos qui legerit, nihil supra vel propter rerum novitatem, atque excellentiam, vel propter dicendi copiam, atque elegantiam requirat. Ad hæc si Principum, & Magistratum, qui curam Reipublicæ gerunt, & civium non fortunas modo, sed dignitatem tuentur, gratia, & auctoritas in fovendis, adjuvandisque

que Artibus parumper consideretur, quot enimvero officia cernimus, quot ornamenta, quot præmia literarum studiis provide, & liberaliter constituta! Ac præmia quidem, ut ut fortasse appareant pro tenui rerum nostrarum conditione non satis ampla, pro celsitudine tamen, & benignitate animorum, a quibus illa proficiunt, aut sunt, aut certe videntur amplissima. Quid quod hac cultissima in urbe nemo est fere, qui eximia generis nobilitate præfulgeat, non idem literatis viris principem in publicis, privatisque conventibus locum deferat, & illos suscipiat humaniter, & blande alloquatur, & omni cum observantiæ, tum amoris officio devinciat, & consuetudine ipsorum, atque familiaritate quamlibentissime utatur; ut propterea minime mirandum sit eos vicissim, qui merito, & fama doctrinæ præcellant, honesta quadam fortunæ mediocritate contentos patriis e finibus ægerrime abstrahi, & amicorum, & civium, præsertim vero nobilium, benevolentiam, & comitatem quibuscumque exterorum sive præmiis, sive honoribus anteferre. Quæ cum ita sint, bono igitur estote animo, & magno, ornatissimi Juvenes; quam suscepistis provinciam alacriter sustinete; quo Parentum sollicitudo, Familiæ decus, Patriæ dignitas, Academiæ splendor, Præceptorum industria, Principum & Magistratum liberalitas vocant contendite, pergite, properate; neque vos vitæ brevitatis, neque naturæ infirmitas, neque fortunæ per-

ver-

veritas, neque ingenii tarditas, neque opinionum varietas, aut judiciorum malignitas, neque Artium difficultas ab instituto cursu deterreant. Vobis enim (ut eo tandem , unde initium duxit , oratio redeat) vobis, inquam, omnibus palam, & aperte profiteor, atque confirmo studiis, & laboribus vestris, si modo ad rectam vitæ rationem, & ad salutem, felicitatemque Reipublicæ dirigantur, opem divini Numinis fidenter, & jugiter imploratam numquam, ut desint cætera, defuturam. **DIXI.**



*Vidit D. Johannes Maria Vidari Clericus Regularis Sancti
Pauli, & in Ecclesia Metropolitana Bononiæ Pæniten-
tarius pro Eminentissimo, & Reverendissimo Domino
Domino Vincentio Cardinali Malvetio Archiepiscopo Bo-
noniæ, & S. R. I. Principe.*

Die 9 Novembris 1762.

IMPRIMATUR.

*Fr. Thomas Vincentius Ronconi Vicarius Generalis S. Offitii
Bononiæ.*

